

<https://news.usm.my>

Berita Mutakhir

25
JUL

RISM SUMBANG DANA TRANSFORMASIKAN PUSAT SUMBER KANAK-KANAK HOSPITAL USM



KUBANG KERIAN, 25 JULAI 2016 – Pertubuhan Juruukur Diraja Malaysia (RISM) telah menyumbangkan dana sebanyak RM20,000 untuk menjayakan projek amal bagi menceriakan Pusat Sumber Wad Pediatrik Hospital Universiti Sains Malaysia (Hospital USM) yang dikenali sebagai Pusat Sumber 2.

Timbalan Pengarah Kanan Pengurusan Hospital USM, Haji Wan Mohd Suyuti Wan Ismail berkata, projek murni ini adalah kerjasama dari Persatuan Penghibur Kanak-Kanak Buih Merah (Red Bubbles), warga Perpustakaan Hamdan Tahir dan Pihak Pengurusan Hospital USM.

“Perpustakaan atau pusat sumber memainkan peranan penting dalam menyimpan dan mengurus sumber maklumat dengan lebih sistematik dan tersusun di samping persekitaran yang ceria dapat menggembarakan hati kanak-kanak yang sedang menerima rawatan.

“Pihak RISM telah menambah koleksi buku-buku dan rak serta perabot lain yang lebih sesuai dan menjadikan pusat sumber tersebut lebih kondusif, selesa dan ceria, sekaligus menarik minat sesiapa sahaja untuk mengunjunginya,” katanya.



Wan Mohd Suyuti berkata, transformasi peranan pusat sumber perlu dikembangkan dengan sewajarnya mengikut situasi dan keperluan persekitaran masyarakat setempat.

“Pusat Sumber 2 Hospital USM yang dikelilingi oleh pesakit kanak-kanak dan peneman sentiasa menjadi tumpuan untuk merehatkan minda buat sementara waktu selepas menjalani rawatan dalam sesuatu tempoh tertentu semasa berada di hospital ini.

“Projek penambahbaikan Pusat Sumber 2 juga telah memberi nilai tambah kepada Perkhidmatan Perpustakaan Bergerak yang telah dilancarkan pada tahun lalu,” jelasnya lagi.

Menurut Wan Mohd Suyuti, projek ini amatlah bermakna dan meninggalkan kesan dalam hati setiap orang yang mengunjungi Pusat Sumber 2 ini kerana suasana yang baharu dan persekitaran yang ceria dapat menggembarakan hati kanak-kanak yang sedang menerima rawatan dan dapat meringankan bebanan perasaan peneman mereka.

“USM berharap agar kemudahan di Pusat Sumber 2 ini dapat dimanfaatkan sepenuhnya dan kerjasama daripada semua pihak amatlah diperlukan untuk mengekalkannya serta menambahbaik dari masa ke semasa.

“USM juga sentiasa mengalu-alukan tanggungjawab sosial korporat daripada badan-badan amal untuk sama-sama membantu mempertingkatkan taraf infostruktur dan infrastruktur masyarakat yang memerlukan,” ujarnya lagi.

Teks: Nik Sheila Erini Che Mat Kamel / Foto: Wan Mohd Rashidi Wan Mood



Share This

Pusat Media dan Perhubungan Awam / Media and Public Relations Centre

Level 1, Building E42, Chancellory II, Universiti Sains Malaysia, 11800 USM, Pulau Pinang Malaysia

Tel : +604-653 3888 | Fax : +604-658 9666 | Email : pro@usm.my (<mailto:pro@usm.my>)

Laman Web Rasmi / Official Website : [Universiti Sains Malaysia \(http://www.usm.my\)](http://www.usm.my)

[Client Feedback / Comments \(http://web.usm.my/smbp/maklumbalas.asp\)](http://web.usm.my/smbp/maklumbalas.asp) | USM News Portal. Hakcipta Terpelihara USM 2015